

Plenchi

Bèl a bati

Bèlèm Bèlèm riiing riiing yega yega paso nos plenchi ta yen di ambiente atrobe. Speshal pa dunabu un ratu agradabel huntu ku nos. Skolnan a bin bèk ku yen di ànimo despues di un fakansi dushi.

Pero awor e kandela bou di e konfo ta bon kayente na skolnan. Paso èksamen a kuminsá na diferente skol. Diferente skol ta preparando duru pa e último raport tambe. Skol a drenta su rekta final i awor tur estudiante i dosente ta riba velocidat haltu pa yega e meta final. Forsa na tur hóben i nan dosentenan ku e temporada kayente aki. Pone tur ku bo tin pa traha i logra bo metanan. No siña pa 6 paso e por bira un 4. Siña pa 10 ya e por bira un 8, pero naturalmente un 10 ta un korona pa bo mes. Ban lanta i reis for di mediokresia. Bo por mas ku esei, bo por ekselá. Ban purba den tur kos ku nos hasi no djis yega final, pero ban yega final ku un prestashon máksimo. Meskos ku bo ke pa esun ku ta dunabu servisio, dunabu un servisio ekselente, duna bo tambe den bo bida diario un esfuerso ekselente den tur loke bo hasi. Ban pé, ánima bo kompañeronan tambe ora bo mira ku nan a desha i ta perdiendo ánimo. Laga nos kompartí nos konosementu ku otro i yuda i sostené otro.

E siman aki nos ke duna un homenahe speshal na Curadoet.

Fantástiko e inisiativa aki ku ya a bira tradishon. Asina bunita i ku ta yuda engrandesé nos pais. E ta yuda pa nos stima, kuida i balorá tur loke nos tin. Danki Curadoet. Danki na e organisashon kompleto. Tur persona ku a kontribuí pa traha ku alma i kurpa. Dios bendishoná boso ríkamente pa boso tempu, esfuerso i amor. Un bon ehèmpel pa nos hóbennan kon nos por uni den kousanan positivo. Akshon i no promesa of papiamentu so. Sino akshon huntu, no pa nos mes interes pero pa un interes general. Pa yuda otronan ku tambe ta komparti e pais aki huntu ku nos. Boso esfuerso i bon ehèmpel, di tur grandi i chiki ta impagabel. Nos skolnan tambe a haña bon yudansa di Curadoet. Skolnan bunita pintá, kuranan limpiá, etc. Nos ta masha masha gradisidu pa boso tempu i amor. Biba Curadoet.

Orashon

Señor kompañá nos hóbenan, nan dosente i mayornan den e temporada final di skol.

Pa tin komprondementu, union i koperashon.

Pa Bo sabiduria kompañá e hóben i kada un persona ku ta kontribui na su èksito.

Señor duna tur hóben e trankilidat pa nan por konsentrá i dedika tempu na nan lèsnan.

Señor yuda mayornan pa nan stimulá i yuda e hoben. Mostra interes den dje i su trabounan di skol.

Duna nos dosentenan, dirigentenan di skol, trahadonan atministrativo i konsierzje hopi pasenshi, perseveransha i amor den nan trabou.

Pa tur su trabou ta semper na bienestar di e hoben.

Riba roster

Chaya ta yama Curadoet danki.

Nos skol a ser aserka pa un kordinado, Janis Vinck, di CURA DOET, algun luna pasá. Esei ta motibu ku aña pasá nos kera partisipá, pero di un òf otro forma nos no a haña kontakto na tempu ku e persona konserní. E aña aki e kordinadó aki mes a aserká skol personalmente pasobra e tabata di opinion ku nos skol tabatin mester di un kara nobo. Naturalmente nos tabata di mesun opinión, pero rekursionan ta poko pa un skol grandi manera esaki yega na esei. Esei tambe ta motibu ku nos a tene e aktividat aki ku dos man. Nos a ser informá di tur e ‘voorwerk’ pa por a realisá e aktividat.

Preparashonnan a start, pero nan tabata enorme. Pero nos ta yama danki na Janis pa su motivashon i dinamismo pa por a yuda nos, nos maestronan dinámiko i naturalmente tambe na e gran kantidat di boluntario, mas o menos 75, ku a yuda nos realisá nos meta. Nos meta tabata pa fèrf skol kompletu i limpia kurá. Mayoría boluntario a skohe pa fèrf. Algún a skohe pa raspa muraya kita fèrf bieu. Otronan a yuda kap takinan ku tabata kologá mucha abou. I un otro grupo a bari blachi nan i yena den saku di shushi. Nos ke yama danki na e ‘crew’ di Technische dienst di RK ku a yuda grandemente tambe den e preparashon pa Cura Doet dia 20 i 21 di mrt 2015 na Chaya por tabata posibel. Nan a sòru di kap palunan ku tabata kologá riba dak, pa skol su kara sali mas i tambe kita ‘goot’nan bieu pa e trabou di fèrfmentu kana mas ‘smooth’. Trabounan no a kaba ainda, pero nos ta super positivo debí ku un grupo grandi di boluntario a bin hasi ‘opname’ di kosnan ku mester hasi ainda i a pone fecha kaba pa bin kaba di hasi e ‘klusjes’ i fèrf pa e skol keda ‘spic & span’. Di e forma aki tambe nos ke yama DANKI

grandi pa tur, alumno, mayor, hobennan, eks-alumnonan, gruponan di trabou i gruponan uniformá ku berdaderamente a *“duna un man pa gana un kurason”* di e tim di maneho, personal i alumnonan di **KOLEGIO CHAYA WILLEMS**.



Den agènda

27 aprel dia di Rey

28, 29 30 aprel dianan ekstra liber

1 mei dia di obrero

Ban Topa di RK 23 di mei

Mi ta konta

E sapatu ta pas

Arsenio tabata un hóben ku tur kaminda tabatin problema. Na kas su mayornan tabatin problema ku su e komportashon. Mayornan tabata duna skol falta di esaki.

Na skol tur maestro e alumno tabatin problema ku komportashon di Arsenio. E tabata pèst tur mucha i tabata insoportabel. Skol tabata duna kas falta di e komportashon malu aki.

Un dia na kaminda pa kas, Arsenio a mira un par di sapatu masha bunita poné na skina di kaminda. El a gusta nan asina tantu ku el a disidí di kue nan bai kas ku ne. Su manisé el a lanta trempan i bisti su

sapatunan. Su kara tabata kontentu i su mayornan a haña su komportashon remarkablemente amabel.

Arsenio a kana bai skol ku smak ku su sapatunan bunita. Segun e ta kana e pianan no por a para ketu. Pianan ta move i baila. El a yega skol ta balia sin fin. Tur mucha i dosente a kuminsa hari asina nan a mir'è. Su pianan a keda balia sin ke stòp. Mas e baila, mas tur hende tabata lora abou di harimentu.

Arsenio a sali bai kas despues di skol bailando ketu bai. Yega kas subi kama i yora su barika yen. El a yora masha masha hopi mes. Paso awor el a sinti kon ta ora bo pèst otro. Kon ta pa pone otro sinti malu. El a pidi pordon na Papa Dios pa tur malu ku el a hasi kontra otro. El a primintí ku e lo no pèst otro nunca mas.

Ora ya a bira nochi ku el a stòp di yora, el a bira i mira ku e sapatunan a dispersé. E por a kana normal atrobe sin baila manera un payaso sin músika sin nada.

For di e dia ei, Arsenio a bira un otro mucha. El a kambia i bira un hóben trankil ku respèt pa otro su sentimentu.

Un preñchi

Curadoet a hasi kos grandi pa Kòrsou i pa nos skolnan.

Diferente potrèt di skolnan di Curadoet aki entre otro di Kolegio Nechi Pieters, Kolegio Chaya Willems i Kolegio Mgr. Wim Ellis.







Mucha djispou

Un doño di trabou, Sandy, ta papia ku su empeado, John, riba su prestashon.

Sandy: Kon nos ta hasi pa bo yega trabou mas trempan. Hasi bo trabounan i kabanán meskos ku tur otro kolega den un tempu rasonabel. Bo retraso den trabou ta masha grandi mes. Tur kos bo ta hasi masha poko poko. Kiko bo ta sinti ku bo por hasi mas lihé den trabou?

John: Mi por bira kansa hopi lihé.